

**Inuussutissarsiutigalugu aalisartut,
inuussutissarsiutigalugu piniartut
inuussutissarsiutigalugulu nunalerinermik
ingerlataqartut aallarteqqinnissamut
tapiiffigineqartarnerat pillugu inatsisartut inatsisaata
allanngortinnaera pillugu Inatsisartut inatsisaat
(Silap pissusianik pissuteqartumik ajornartorsiornerni
ajunaarnersuarnullu assingusuni pisuni
aallarteqqinnissamut tapiissutisisinnaaneq,
akiliutigineqartartut qaffanneri kiisalu
qinnuteqarnissamut piffissaliussamik eqqussineq)**

§ 1

Inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerinermik ingerlataqartut aallarteqqinnissamut tapiiffigineqartarnerat pillugu inatsisartut inatsisaanni nr. 3, 21.maj 2004-meersumi imatut allannguisoqarpoq:

1. § 1 imatut oqaasertalerneqarpoq:

" **§ 1.** Inuussutissarsiutigalugu aalisartunut, inuussutissarsiutigalugu piniartunut inuussutissarsiutigalugulu nunalerinermik ingerlataqartunut pigisat ajoquenerisigut imaluunniit ukuninnga peqquteqartumik inuussutissarsiuiminnt tunngatillugu annaasaqarsimasunut Naalakkersuisut aallarteqqinnissamut tapiissuteqarsinnaapput:

- 1) atortut ajoqueneri uppernarsarneqarsimappata,
- 2) inuussutissarsiummut tunngasut atortut tammarsimappata,
- 3) uppernarsarneqarsinnaasumik ilungersunartumik napparsimasoqarpat allatigulluunniit uppernarsarneqarsinnaasumik ajoquenermik kinguneqartumik timi atorlugu sulisinnaajunnaartoqarsimappat imaluunniit ingerlataqartup inuussutissarsiutaanut atassuteqartuni atortut aserorsimappata, imaluunniit
- 4) inuussutissarsiornikkut nalinginnaasumik assigisaanilluunniit akornusertoqarsimapp.

Imm. 2. Silap pissusaata allanngorneranik allatigulluunniit ajunaarnersuarmik pisoqarneranik peqquteqartumik inuussutissarsiornikkut isertitat tamakkiisut imaluunniit annertuut sivikitsumik ilimasaarneqarnikkut

annaaneqarpata imm. 1, nr. 1-4-mi taaneqartut saniatigut imm. 1-im i taaneqartunut inunnut aningasatigut Naalakkersuisut aallarteqqinnissamut tapiissuteqarsinnaapput.

Imm. 3. Imm. 1-2-mi pisunut uppernarsaanissaq pillugu Naalakkersuisut sukumiinerusumik malittarisassaliorsinnaapput. ”

2. § 2 imatut oqaasertalerneqarpoq:

” **§ 2.** Aallarteqqinnissamut tapiissutit tunniunneqarnissaannut piumasarineqarpoq § 1-im i ilaasut pisut matussusereerneqarsimassanngitsut imaluunniit nammineerluni pisortalluunniit sillimmasiinerinit matussuserneqarsinnaanngitsut.

Imm. 2. Ingerlatsisoq qinnuteqarnerup nalaanit ukiut pingasut sioqquillugit ukiumut agguaqatigiissillugit 250.000 kr.-nik ikinnerusunilluunniit isertitaqarsimappat peqatigisaanillu qinnuteqarnerup nalaanit ukiut pingasut sioqquillugit agguaqatigiissillugit 100.000 kr.-t amerlaqataannik ikinnerusunilluunniit nalilinnik pigisaqarpat Naalakkersuisut imm. 1 avaqqussinnaavaat aallarteqqinnissamullu tapiissuteqarlutik.”

3. § 3 imatut oqaasertalerneqarpoq:

” **§ 3.** Aallarteqqinnissamut tapiissutinik qinnuteqaat Naalakkersuisunut tunniunneqassaaq.

Imm. 2. Aallarteqqinnissamut tapiiffigineqarnissaq pillugu qinnuteqarnermi Naalakkersuisut qinnuteqarnermut immersugassiaat atorneqassaaq. Atortut ajoquserneri sakkulluunniit tammarneri pissutigalugit annasanut aallarteqqinnissamut tapiiffigineqarnissamut qinnuteqaat, tak. § 1, nr. 1-2, ajoqusernerup tammaasaqarnerulluunniit pinerata kingorna qaammatisiutini ullut 30-t qaangiutsinnagit tunniunneqassaaq.

Imm. 3. Imm. 1 malillugu qinnuteqaammut qinnuteqartup aningaasaqarnikkut inissismaffia pillugu uppernarsaat kiisalu inuussutissarsiornermut attuumasumik annaasaqarneq pillugu uppernarsaat ilaatinneqassaaq, takuu § 1.

Imm. 4. Aallarteqqinnissamut tapiissutit sapinngisamik soqutigisaqqaqtigii kattuffiat susassaqartoq tusarniaavigereerlugu tunniunneqartassapput. § 1, imm. 1, nr. 4-mi aamma § 1, imm. 2-mi pisuni taaneqartuni soqutigisaqqaqtigii kattuffiat tusarniaavagineqartassaaq.”

4. § 3-p kingorna immikkoortup quleputaa sioqquillugu ilanngunneqarpoq ”Aallarteqqinnissamut tapiissutit tunniunneqartarneri”:

” **§ 3 a.** Aallarteqqinnissamut tapiissutit qinnuteqaammik aalajangersimasumik naliliineq tunuliaqutaralugu tunniunneqartassapput, tassunga ilanngullugu aallarteqqinnissamut aningaasartuit akilernissaannut qinnuteqartoq nammineq naammattunik aningaasaateqarnersoq.

Imm. 2. Atortut assingisa aseroqqinnerannut tammaqqinnerannulluunniit, tak. § 1, imm. 1, nr. 1-2, siusinnerpaamik tunniussinerup kingorna qaammatisiutini ukiut pingasut qaangiunneranni aallarteqqinnissamut tapiiffigineqarnissamut qinnuteqartoqarsinnaavoq.”

5. § 4 imatut oqaasertalerneqarpoq:

” **§ 4.** Aallarteqqinnissamut tapiissutit minnerpaamik 2.000 kr. annerpaamillu 50.000 kr. ataasiaannarluni tapiissutit tunniunneqassapput. Aningaasanut inatsimmi aningaasaliissutigineqartut iluanni aallarteqqinnissamut tapiissutisisoqarnissaanut taamaallaat aalajangiisoqarsinnaavoq.

Imm. 2. Naalakkersuisut aallarteqqinnissamut tapiissutit tunniunneqarnerannut piumasarisinnaavaat qinnuteqaateqartoq tapiissutit qanoq atorneqarnerat pillugit kingornatigut Naalakkersuisut piffissaliussaata iluani nassuaateqassasoq.”

6. Inatsimmi tamarmi "Landsstyre" imatut allangortinneqassaaq: "Naalakkersuisut".

§ 2

Inatsisartut inatsisaat 1. januar 2025-mi atuutilissaaq.

Namminersorlutik Oqartussat, ulloq 25. novembari 2024

Múte Bourup Egede (atsior.)

Naalakkersuisut Siulittaasuat

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut